



KENYATAAN MEDIA

SIASATAN JABATAN ALAM SEKITAR KE ATAS ADUAN PELEPASAN ASAP HITAM OLEH PREMIS PENAPISAN MINYAK MENTAH DI PORT DICKSON, NEGERI SEMBILAN

Kementerian Sumber Asli dan Kelestarian Alam (NRES) melalui Jabatan Alam Sekitar (JAS) telah menerima satu maklumat aduan alam sekitar berhubung pelepasan asap hitam daripada sebuah premis penapisan minyak mentah di Port Dickson, Negeri Sembilan pada 19 Jun 2024.

Pelepasan asap hitam tersebut menyebabkan pencemaran udara dan mengganggu penduduk di perumahan berhampiran seperti di Taman Toh Kee Kah dan Taman Mewah, Port Dickson Negeri Sembilan.

Berdasarkan siasatan JAS pada hari yang sama mendapati premis tersebut mengalami insiden kebocoran pada tiub dandang (*boiler*). Proses penapisan minyak mentah telah dihentikan dengan segera (*emergency shutdown*). Bagi tujuan keselamatan, gas yang terhasil disalurkan ke unit flare untuk pembakaran sebelum dilepaskan ke udara. Pembakaran di unit flare tersebut telah menyebabkan pelepasan asap hitam berikutan pembakaran gas yang tidak sempurna.

Sehubungan itu, semua proses telah dihentikan untuk tindakan pembaikan di dandang oleh pihak premis. JAS juga telah mengeluarkan Notis Arahan di bawah Seksyen 31 dan Seksyen 37, Akta Kualiti Alam Sekeliling 1974 (Akta 127) supaya pihak premis mengemukakan program pemantauan berdasarkan Peraturan 22(1)(a), Peraturan-Peraturan Kualiti Alam Sekeliling (Udara Bersih) 2014.

Sebelum beroperasi semula, pihak premis telah memaklumkan penduduk berhampiran pada 2 Julai 2024 berhubung proses startup yang dijadualkan bermula 3 hingga 6 Julai 2024. Penduduk juga telah dimaklumkan bahawa terdapat kemungkinan gangguan bersifat sementara seperti bunyi bising dan pelepasan asap hitam dari unit flare sepanjang tempoh startup tersebut.

Walau bagaimanapun, pihak premis perlu memastikan pelepasan asap tersebut tidak lebih gelap daripada kegelapan No. 2 dalam Carta Ringelmann selama agregat yang kurang daripada lima minit dalam mana-mana tempoh satu jam, dengan syarat bahawa tempoh keseluruhan pelepasan itu tidak melebihi agregat 15 minit dalam mana-mana tempoh 24 jam sebagaimana yang dinyatakan di bawah Peraturan 12 (2) Peraturan-Peraturan Kualiti Alam Sekeliling (Udara Bersih) 2014.

Semua pihak industri adalah diingatkan bahawa tindakan tegas di bawah Akta 127 akan dikenakan ke atas mana-mana premis yang melakukan pencemaran alam sekitar.

JAS juga menyeru orang awam untuk melaporkan sebarang aktiviti mencemarkan alam sekitar di talian bebas tol 1-800-88-2727 yang beroperasi 24 jam sehari atau e-mel ke aduan_k@doe.gov.my dan melalui portal e-aduan JAS di <https://eaduan.doe.gov.my>.

KEMENTERIAN SUMBER ASLI DAN KELESTARIAN ALAM

6 JULAI 2024

Unit Komunikasi Korporat | Kementerian Sumber Asli dan Kelestarian Alam (NRES)
Tel. : 03-8000 8000 | Faks : 03-8889 4763

    [nresmalaysia](https://www.facebook.com/nresmalaysia)